



«18» օգոստոսի 2023թ.

Ք. Երևան

Որոշում N 1375

**ՎԱՐՉԱԿԱՆ ՏՈՒՅԺ ՆՇԱՆԱԿԵԼՈՒ ՄԱՍԻՆ**

ՀՀ առողջապահական և աշխատանքի տեսչական մարմնի (այսուհետ՝ Տեսչական մարմին) ղեկավար Սլավիկ Սարգսյանս ուսումնասիրելով.

1. 2023 թվականի ապրիլի 12-ի փաստաթղթեր, նյութեր, նմուշներ և այլ առարկաներ վերցնելու մասին արձանագրությունը,
2. ՀՀ առողջապահական և աշխատանքի տեսչական մարմնի 2023 թվականի ապրիլի 13-ի թիվ 06/7609-2023 գրությունը,
3. ՀՀ առողջապահության նախարարության կողմից 2023 թվականի հունիսի 28-ին ստացված թիվ ԱԱ/22.2/14800-2023 գրությունը,
4. 2023 թվականի հուլիսի 04-ի թիվ Ն/9413-2023 միջնորդությունը՝ կից զեկուցագրով,
5. 2023 թվականի հուլիսի 06-ի թիվ 06/14956-2023 «Վարչական իրավախախտումների վերաբերյալ արձանագրության կազմմանը հրավիրելու մասին» ծանուցագիրը (փոստային առաքանի՝ LO110234340AM, հետադարձ՝ ALO110234340AM, 08.07.2023թ., փոստային առաքանի՝ LO110234213AM),
6. 2023 թվականի հուլիսի 27-ի թիվ 1300 «Վարչական իրավախախտման վերաբերյալ» արձանագրությունը (փոստային առաքանի՝ LO110545170AM, հետադարձ՝ ALO110545170AM, 01.08.2023թ.),
7. 2023 թվականի հուլիսի 27-ի թիվ 06/16683-2023 (փոստային առաքանի՝ LO110545170AM, հետադարձ՝ ALO110545170AM, 01.08.2023թ.) և 2023 թվականի օգոստոսի 10-ի թիվ 06/17716-2023 (փոստային առաքանի՝ LO110770983AM, հետադարձ՝ ALO110770983AM, 14.08.2023թ., փոստային առաքանի՝

LO110770924AM) վարչական իրավախախտման վերաբերյալ գործի քննությանը հրավիրելու մասին ծանուցագրերը,

8. ՀՀ պետական եկամուտների կոմիտե ուղղված 2023 թվականի օգոստոսի 14-ի թիվ 06/18022-2023 գրությունը.

## **Պարզեցի**

### **Նկարագրական մաս**

2023 թվականի ապրիլի 06-ի թիվ 23040209 հանձնարարագրի հիման վրա «ԲՈՆՈՒՍՍ» ՍՊ ընկերությունում իրականացված ստուգման շրջանակներում վերջինիս պատկանող դեղատան վաճառասրահի դարակաշարի վրայից սույն թվականի ապրիլի 12-ին վերցվել և արձանագրվել է ՀՀ-ում գրանցված, օրինական ներմուծված (ՀՀ առողջապահության նախարարության կողմից հավաստագրված) լինելու և շրջանառվելու առումով կասկած հարուցող «Սիրդալուդ 2 մգ դեղահատեր N 30, սերիա՝ LX91780222, պիտանիության ժամկետ՝ 01.2025 – 1 փաթեթ» դեղը:

Դեղի վրա առկա դրոշմապիտակի (ԶԲ0249659141) վերագրման արդյունքում պարզվել է, որ այն Հայաստանի Հանրապետություն է ներմուծվել «ԴԱՆԻ ՖԱՐՄ» ՍՊ ընկերության կողմից:

Վերոնշյալ դեղը Տեսչական մարմնի կողմից 2023 թվականի ապրիլի 13-ի թիվ 06/7609-2023 գրությամբ ուղարկվել է ՀՀ առողջապահության նախարարություն՝ Հայաստանի Հանրապետությունում գրանցված և/կամ օրինական ներմուծված լինելու վերաբերյալ տեղեկատվություն ստանալու նպատակով:

ԱԱ/22.2/14800-2023 գրությամբ ստացված տեղեկատվության համաձայն «Սիրդալուդ թիզանիդին (թիզանիդինի հիդրոքլորիդ) դեղահատեր 2 մգ; (30/3×10/) բլիստերում» Ռուսաստան Նովարտիս Նեվա ՍՊԸ, սերիա՝ LX91780222, պիտանիության ժամկետ՝ 01.2025», դեղի սերիան բացակայում է ՀՀ ԱՆ «Ակադեմիկոս Էմիլ Գաբրիելյանի անվան դեղերի և բժշկական տեխնոլոգիաների փորձագիտական կենտրոն» ՓԲ ընկերության ներմուծման փորձաքննության տվյալների բազայում:

Փաստական տվյալների վերլուծության և համադրման արդյունքում պարզվել է, որ խախտվել են «Դեղերի մասին» ՀՀ օրենքի 21-րդ հոդվածի 4-րդ և 23-րդ հոդվածի 2-րդ մասերով սահմանված պահանջների պահպանումը:

Հիմք ընդունելով «Վարչական իրավախախտումների վերաբերյալ» ՀՀ օրենսգրքի 255-րդ հոդվածը, 2023 թվականի հուլիսի 27-ին կազմվել է թիվ 1300 վարչական իրավախախտումների վերաբերյալ արձանագրությունը, որը վարչական իրավախախտումների վերաբերյալ գործի քննության 2023 թվականի հուլիսի 27-ի թիվ 06/16683-2023 ծանուցագրի հետ փոստային առաքմամբ / հետադարձ ծանուցմամբ առաքվել է «ԴԱՆԻ ՖԱՐՄ» ՍՊ ընկերության տնօրեն Հովիկ Մեսրոպյանին (փոստային առաքանի՝ LO110545170AM, ALO110545170AM, 01.08.2023թ.):

Տեսչական մարմնում 2023 թվականի օգոստոսի 09-ին տեղի է ունեցել գործի քննություն, որի ընթացքում անհրաժեշտություն է առաջացել ստանալու որոշակի տեղեկատվություն, որոշվել է գործի քննությունը շարունակել 2023 թվականի օգոստոսի 18-ին, որի վերաբերյալ 2023 թվականի օգոստոսի 10-ի թիվ 06/17716-2023 ծանուցագրով փոստային առաքմամբ / հետադարձ ծանուցմամբ Հովիկ Մեսրոպյանը պատշաճ ծանուցվել է:

Տեսչական մարմնում (ք. Երևան, Արմենակյան 129) 2023 թվականի օգոստոսի 18-ին ժամը 10:00-ին տեղի է ունեցել վարչական իրավախախտման վերաբերյալ գործի քննություն, որին պատշաճ կարգով ծանուցված Հովիկ Մեսրոպյանը կամ իր կողմից լիազորված անձը չի ներկայացել: Վերջինս չի ներկայացրել միջնորդություն գործի քննությունը հետաձգելու մասին:

#### Պատճառաբանական մաս

«Դեղերի մասին» ՀՀ օրենքի 21-րդ հոդվածի 4-րդ մասի համաձայն՝ «Դեղեր, դեղանյութեր, դեղաբուսական հումք, հետազոտվող դեղագործական արտադրանք ներմուծել թույլատրվում է ներմուծման հավաստագրի հիման վրա, բացառությամբ սույն հոդվածով նախատեսված դեպքերի: Արտահանման դեպքում հավաստագիր տրամադրվում է արտահանողի ցանկությամբ: Ներմուծման կամ արտահանման հավաստագրերը տրվում են համապատասխան փորձագիտական եզրակացության

հիման վրա՝ Հայաստանի Հանրապետության կառավարության սահմանած կարգով: Հայաստանի Հանրապետության կառավարությունը սահմանում է դեղերի, դեղանյութերի, դեղաբուսական հումքի, հետազոտվող դեղագործական արտադրանքի ներմուծման կամ արտահանման համար իրականացվող փորձաքննության կարգը և անհրաժեշտ փաստաթղթերի ցանկը»:

Հավաստագիր ստանալու նպատակով ներմուծողի կողմից ներկայացվում է հայտ, որի հիման վրա՝ ներմուծվող դեղագործական արտադրանքի բոլոր անվանումների բոլոր սերիաներից ընտրվում է մեկական նմուշ՝ համապատասխան դեղերի գրանցանմուշների նույնականությունը հավաստելու համար, նշվածից պարզ է դառնում, որ Առողջապահության նախարարությունում առկա է լինում Հայաստանի Հանրապետություն օրինական ճանապարհով ներմուծված բոլոր դեղերի սերիաների վերաբերյալ տեղեկատվություն: Վերոգրյալից պարզ է դառնում, որ այն դեպքերում, երբ Առողջապահության նախարարության ներմուծման տվյալների բազայում դեղերի ներմուծման վերաբերյալ տեղեկությունները բացակայում են, ապա տվյալ դեղերը Հայաստանի Հանրապետություն ներմուծված են եղել օրենքի խախտմամբ:

«Դեղերի մասին» ՀՀ օրենքի 23-րդ հոդվածի 2-րդ մասի համաձայն՝ «Արգելվում է իրացնել Հայաստանի Հանրապետությունում չգրանցված կամ որակի պահանջներին չհամապատասխանող կամ պիտանիության ժամկետն անցած կամ գրանցումն ուժը կորցրած ճանաչված կամ գրանցումը կասեցված կամ շրջանառությունը դադարեցված (հետ կանչված), Հայաստանի Հանրապետության օրենսդրության խախտմամբ ներմուծված դեղերը, կեղծ դեղերը, դեղանյութերը, դեղաբուսական հումքը, հետազոտվող դեղագործական արտադրանքը»:

Վերլուծելով վերոգրյալ նորմերը և ուսումնասիրելով գործում առկա նյութերը, վարչական մարմինը հաստատված է համարում, որ Հովիկ Մեսրոպյանի կողմից խախտվել են «Դեղերի մասին» ՀՀ օրենքի 21-րդ հոդվածի 4-րդ և 23-րդ հոդվածի 2-րդ մասերով սահմանված պահանջների պահպանումը, մասնավորապես Հայաստանի Հանրապետություն առանց դեղերի և դեղանյութերի ներմուծման հավաստագրի ներմուծվել է դեղ, ապա նշված դեղն իրացվել է Հայաստանի Հանրապետությունում (հիմք՝ 2023 թվականի հուլիսի 27-ի «Վարչական իրավախախտումների վերաբերյալ» թիվ 1300 արձանագրություն):

«Վարչական իրավախախտումների վերաբերյալ» ՀՀ օրենսգրքի 267-րդ հոդվածի համաձայն՝ վարչական իրավախախտման վերաբերյալ գործը քննվում է վարչական պատասխանատվության ենթարկվող անձի ներկայությամբ: Գործը կարող է այդ անձի բացակայությամբ քննվել միայն այն դեպքերում, երբ տվյալներ կան գործի քննության տեղի և ժամանակի մասին նրան ժամանակին ծանուցելու վերաբերյալ և եթե նրանից միջնորդություն չի ստացվել գործի քննությունը հետաձգելու մասին: Վարչական իրավախախտման վերաբերյալ 2023 թվականի օգոստոսի 09-ին և 18-ին կայացած գործի քննություններին պատշաճ կարգով ծանուցված Հովիկ Մեսրոպյանը կամ իր կողմից լիազորված անձը չի ներկայացել և չի ներկայացրել միջնորդություն գործի քննությունը հետաձգելու մասին:

Վարչական իրավախախտումների վերաբերյալ գործի քննության արդյունքում վարչական մարմինը, քննելով գործում առկա բոլոր փաստական հանգամանքները, հաստատված է համարում, որ կատարվել է վարչական իրավախախտում, որի համար պատասխանատու է Հովիկ Գևորգի Մեսրոպյանը (հասցե՝ ք. Երևան, Աջափնյակ, Նորաշեն թղմ. /Շ/37/67 անձնագրային տվյալներ՝ AS0395631, տրված՝ 15.10.2018 թվականին, 012-ի կողմից):

Վերջինիս կողմից վարչական իրավախախտում կատարելու մեջ առկա չեն «Վարչական իրավախախտումների վերաբերյալ» ՀՀ օրենսգրքի 33-րդ և 34-րդ հոդվածներով սահմանված վարչական պատասխանատվությունը մեղմացնող և ծանրացնող հանգամանքներ:

«Վարչական իրավախախտումների վերաբերյալ» ՀՀ օրենսգրքի 9-րդ հոդվածի համաձայն՝ վարչական իրավախախտում (զանցանք) է համարվում պետական կամ հասարակական կարգի, սոցիալիստական սեփականության, քաղաքացիների իրավունքների և ազատությունների, կառավարման սահմանված կարգի դեմ ոտնձգվող հակաիրավական, մեղավոր (դիտավորյալ կամ անզգույշ) այնպիսի գործողությունը կամ անգործությունը, որի համար օրենսդրությամբ նախատեսված է վարչական պատասխանատվություն: Նշված իրավանորմից հետևում է, որ օրենսդիրը վարչական իրավախախտման առկայության հիմքում դրել է մեղքի առկայությունը, որը կարող է դրսևորվել դիտավորությամբ կամ անզգուշությամբ:

Վարչական մարմինը գտնում է, որ Հովիկ Գևորգի Մեսրոպյանի կողմից իրավախախտումը կատարվել է անզգուշությամբ:

«Վարչական իրավախախտումների վերաբերյալ» ՀՀ օրենսգրքի 11-րդ հոդվածի համաձայն՝ վարչական իրավախախտումը համարվում է անզգուշությամբ կատարված, եթե այն կատարած անձը կանխատեսել է իր գործողության կամ անգործության վնասակար հետևանքների առաջացման հնարավորությունը, բայց թեթևամտորեն հույս է ունեցել կանխելու դրանք կամ չի կանխատեսել այդպիսի հետևանքներ առաջանալու հնարավորությունները, թեև պարտավոր էր և կարող էր կանխատեսել դրանք:

«Վարչական իրավախախտումների վերաբերյալ» ՀՀ օրենսգրքի 14-րդ հոդվածի համաձայն՝ պաշտոնատար անձինք ենթակա են վարչական պատասխանատվության այնպիսի վարչական իրավախախտումների համար, որոնք կապված են կառավարման կարգի, պետական ու հասարակական կարգի, բնության, բնակչության առողջության պահպանության ոլորտում սահմանված կանոնները և մյուս այն կանոնները չպահպանելու հետ, որոնց կատարման ապահովումը մտնում է նրանց պաշտոնական պարտականությունների մեջ: Նշված հոդվածից հետևում է, որ Հովիկ Գևորգի Մեսրոպյանը ՀՀ օրենսդրությամբ սահմանված կարգով քաղաքացիաիրավական և վարչաիրավական հարաբերություններում հանդես է գալիս որպես ընկերության տնօրեն՝ պաշտոնատար անձ:

Հայաստանի Հանրապետության Սահմանադրության 73-րդ հոդվածի 1-ին մասի համաձայն «Անձի իրավական վիճակը վատթարացնող օրենքները և այլ իրավական ակտերը հետադարձ ուժ չունեն»:

«Վարչական իրավախախտումների վերաբերյալ» ՀՀ օրենսգրքի 8-րդ հոդվածի համաձայն՝ «Վարչական իրավախախտում կատարած անձը ենթակա է պատասխանատվության իրավախախտումը կատարելու ժամանակ և վայրում գործող օրենսդրության հիման վրա:

Վարչական իրավախախտումների համար պատասխանատվությունը մեղմացնող կամ վերացնող ակտերը հետադարձ ուժ ունեն, այսինքն՝ տարածվում են նաև այդ ակտերի հրատարակումից առաջ կատարված իրավախախտումների վրա:

Վարչական իրավախախտումների համար պատասխանատվություն սահմանող կամ այն ուժեղացնող ակտերը հետադարձ ուժ չունեն:

Վարչական իրավախախտումների գործերի վարույթը իրականացվում է իրավախախտման վերաբերյալ գործի քննության ժամանակ և վայրում գործող օրենսդրության հիման վրա»:

Իրավական ակտը համարվում է պատասխանատվությունը խստացնող, եթե սանկցիայում նախատեսված պատասխանատվության տեսակը փոխարինվում է ավելի խիստ պատասխանատվության տեսակով: Ընդ որում, տուգանքների դեպքում պատասխանատվությունը խստացնող է դիտվում այն դրույթը, որով նախկինում գործող տուգանքը փոխարինվել է ավելի բարձր չափի տուգանքով:

«Վարչական իրավախախտումների վերաբերյալ Հայաստանի Հանրապետության օրենսգրքում փոփոխություններ և լրացում կատարելու մասին» ՀՕ-35-Ն ՀՀ օրենքով (այսուհետ՝ ՀՕ-35-Ն օրենք) Վարչական իրավախախտումների վերաբերյալ ՀՀ օրենսգրքի 47.3-րդ հոդվածի 1-ին մասով սահմանված սանկցիաները խստացվել են (ուժի մեջ է մտել 06.03.2023 թվականին), համաձայն որի՝

«Հայաստանի Հանրապետությունում չգրանցված (բացառությամբ Հայաստանի Հանրապետության օրենսդրությամբ սահմանված դեպքերի) կամ գրանցումն օրենքով սահմանված կարգով կասեցված կամ օրենքի խախտմամբ դեղեր ներմուծելը կամ արտադրելը կամ պահպանելը կամ բաշխելը կամ իրացնելը՝

առաջացնում է տուգանքի նշանակում՝ յուրաքանչյուր անվանմամբ դեղի՝

1) մինչև 5 դեղի փաթեթի դեպքում՝ սահմանված նվազագույն աշխատավարձի հազարապատիկի չափով.

2) 5-ից ավելի դեղի փաթեթի դեպքում՝ սահմանված նվազագույն աշխատավարձի երկուհազարապատիկի չափով»:

2023 թվականի օգոստոսի 10-ի թիվ 06/17716-2023 ծանուցագրով Հովիկ Մեսրոպյանը կամ նրա լիազորված անձը հրավիրվել է մասնակցելու Տեսչական մարմնում կայանալիք գործի քննությանը, միաժամանակ առաջարկվել է մինչև գործի քննությունը տրամադրել «Սիրդալուդ 2 մգ դեղահատեր N 30, սերիա՝ LX91780222, պիտանիության ժամկետ՝ 01.2025» դեղի ներմուծման և իրացման վերաբերյալ տեղեկատվություն:

Ի պատասխան վերոնշյալ ծանուցագրի՝ 2023 թվականի օգոստոսի 18-ին ստացվել է թիվ Մ-9378-2023 գրությունը, որով «ԴԱՆԻ ՖԱՐՄ» ՍՊ ընկերության անունից հանդես եկող Հայկ Սահակյանը խնդրել է հայտնել, թե վերոնշյալ տեղեկատվության տրամադրումն ի՞նչ փաստի հաստատմանը կամ հերքմանն է ծառայելու և ինչպե՞ս է այն ազդելու Հովիկ Մեսրոպյանի իրավունքների վրա: Պաշտոնատար անձ Հովիկ Մեսրոպյանը ըստ էության որևէ տեղեկատվություն չի տրամադրել 2023 թվականի օգոստոսի 10-ի թիվ 06/17716-2023 ծանուցագրով պահանջված փաստական տվյալների վերաբերյալ:

2023 թվականի օգոստոսի 14-ի թիվ 06/18022-2023 գրությամբ Տեսչական մարմինը դիմել է նաև ՀՀ պետական եկամուտների կոմիտեին՝ վերոնշյալ դեղի ներմուծման և իրացման վերաբերյալ ըստ ժամանակագրության տեղեկատվություն ստամալու նպատակով, սակայն պատասխան գրություն չի ստացվել:

Հաշվի առնելով, որ Հովիկ Գևորգի Մեսրոպյանի կողմից օրենքի խախտմամբ Հայաստանի Հանրապետություն «Սիրդալուդ 2 մգ դեղահատեր N 30, սերիա՝ LX91780222, պիտանիության ժամկետ՝ 01.2025» դեղը հնարավոր է ներմուծվել և իրացվել է մինչև ՀՕ-35-Ն օրենքով նախատեսված խստացվող նորմի ուժի մեջ մտնելը, ապա պետք է կիրառել մինչև ՀՕ-35-Ն օրենքի ուժի մեջ մտնելը գործող խմբագրությամբ «Վարչական իրավախախտումների վերաբերյալ» ՀՀ օրենսգրքի 47.3-րդ հոդվածի 1-ին մասը, որի համաձայն՝

«Հայաստանի Հանրապետությունում չգրանցված (բացառությամբ Հայաստանի Հանրապետության օրենսդրությամբ սահմանված դեպքերի) կամ գրանցումն օրենքով սահմանված կարգով կասեցված կամ օրենքի խախտմամբ դեղեր ներմուծելը կամ արտադրելը կամ պահպանելը կամ բաշխելը կամ իրացնելը կամ կիրառելը՝

առաջացնում է տուգանքի նշանակում՝ յուրաքանչյուր անվանմամբ դեղի՝

1) մինչև 10 փաթեթի դեպքում՝ սահմանված նվազագույն աշխատավարձի հարյուրապատիկից մինչև հարյուրհիսնապատիկի չափով:

Եզրափակիչ մաս



Ղեկավարվելով «Վարչական իրավախախտումների վերաբերյալ» ՀՀ օրենսգրքի 230, 279, 281, 283-րդ հոդվածներով, և 282-րդ հոդվածի 1-ին մասով՝

### Որոշեցի

1. Հովիկ Գևորգի Մեսրոպյանին (անձնագրային տվյալներ՝ AS0395631, տրված՝ 15.10.2018 թվականին, 012-ի կողմից)՝ որպես խախտում թույլ տված անձի.

1) «Դեղերի մասին» ՀՀ օրենքի 21-րդ հոդվածի 4-րդ մասով սահմանված պահանջները խախտելու համար.

«Վարչական իրավախախտումների վերաբերյալ» ՀՀ օրենսգրքի 47.3 հոդվածի 1-ին մասի 1-ին կետի պահանջով (մինչև ՀՕ-35-Ն օրենքի ուժի մեջ մտնելը գործող խմբագրությամբ), օրենքի խախտմամբ Հայաստանի Հանրապետություն «Սիրդալուդ 2 մգ դեղահատեր N 30, սերիա՝ LX91780222, պիտանիության ժամկետ՝ 01.2025 – 1 փաթեթ» դեղի **ներմուծման համար** ենթարկել վարչական տույժի՝ յուրաքանչյուր անվանմամբ դեղի համար սահմանված նվազագույն աշխատավարձի հարյուրապատիկի չափով՝ 1 (մեկ) անվանում դեղի համար՝ **100.000 (հարյուր հազար)**

**ՀՀ դրամ վարչական տուգանքի:**

2) «Դեղերի մասին» ՀՀ օրենքի 23-րդ հոդվածի 2-րդ մասով սահմանված պահանջները խախտելու համար.

«Վարչական իրավախախտումների վերաբերյալ» ՀՀ օրենսգրքի 47.3 հոդվածի 1-ին մասի 1-ին կետի պահանջով (մինչև ՀՕ-35-Ն օրենքի ուժի մեջ մտնելը գործող խմբագրությամբ), օրենքի խախտմամբ Հայաստանի Հանրապետություն ներմուծված «Սիրդալուդ 2 մգ դեղահատեր N 30, սերիա՝ LX91780222, պիտանիության ժամկետ՝ 01.2025 – 1 փաթեթ» դեղի **իրացման համար** ենթարկել վարչական տույժի՝ յուրաքանչյուր անվանմամբ դեղի համար սահմանված նվազագույն աշխատավարձի հարյուրապատիկի չափով՝ 1 (մեկ) անվանում դեղի համար՝ **100.000 (հարյուր հազար)** **ՀՀ դրամ վարչական տուգանքի:**

3) **Վարչական տուգանքի ընդհանուր գումարը կազմում է 200.000 (երկու հարյուր հազար) ՀՀ դրամ:**

2. Սույն որոշումը ծանուցել Հովիկ Գևորգի Մեսրոպյանին (հասցե՝ ք Երևան, Աջափնյակ, Նորաշեն թղմ. /Շ/37/67 անձնագրային տվյալներ՝ AS0395631, տրված՝

15.10.2018 թվականին, 012-ի կողմից), ինչպես նաև ք. Երևան, Աջափնյակ, Մ. Մազմանյան փողոց 5/28 հասցեով:

3. Սույն վարչական ակտն ուժի մեջ է մտնում վարչական վարույթի մասնակցին իրազեկելուն հաջորդող օրվանից:

4. Սույն որոշումը ստանալու օրվանից 30 օրվա ընթացքում կարող է բողոքարկվել ակտն ընդունած Տեսչական մարմին կամ ՀՀ վարչական դատավարության օրենսգրքի 72-րդ հոդվածով սահմանված ժամկետում՝ ՀՀ վարչական դատարան:

5. Իրերի և փաստաթղթերի հարցը լուծվել է:



Recoverable Signature

X

ՍԼԱՎԻԿ ՍԱՐԳՍՅԱՆ

Signed by: SARGSYAN SLAVIK 3807890467

ՍԼԱՎԻԿ ՍԱՐԳՍՅԱՆ

Ինձ բացատրվել է, որ համաձայն «Վարչական իրավախախտումների վերաբերյալ» ՀՀ օրենսգրքի 305-րդ հոդվածի 1-ին մասի, տուգանքը պետք է վճարվի տուգանք նշանակելու մասին որոշումը հանձնելու օրվանից ոչ ուշ, քան տասնհինգ օրվա ընթացքում, իսկ այդ որոշումը գանգատարկելու կամ բողոքարկելու դեպքում՝ գանգատը կամ բողոքը առանց բավարարման թողնելու մասին ծանուցման օրվանից ոչ ուշ, քան տասնհինգ օրվա ընթացքում:

#### Ծանոթություն՝

Իրավախախտման համար կիրառվող տուգանքի վճարման պետքյուջեի հաշվի համարը՝ ՀՀ առողջապահական և աշխատանքի տեսչական մարմնի կողմից իրավախախտումների համար կիրառվող տուգանքների և պատժամիջոցների մուտքեր N900005024097:

Որոշումը ստացա \_\_\_\_\_

(անունը, հայրանունը, ազգանունը, պաշտոնը, ամսաթիվը)

Որոշումը ստանալուց և ստորագրելուց հրաժարվելու մասին նշում \_\_\_\_\_

Նշում որոշումը պատվիրված փոստով ուղարկելու և ստանալու ծանուցման մասին

---

---

---

---

(ուղարկելու ամսաթիվը, փոստային առաքանու համարը, փոստային առաքանին հասցեատիրոջը հանձնելու վերաբերյալ  
ծանուցագրի համարը)